

乾隆元和縣志

元和縣志卷之二十六

流寓

四方人士往來於吳者多矣然非其人不傳卽
行誼可述而或舟車信宿非游習於斯瘞埋於
斯者不與焉今自澹臺滅明以下若干人合爲
一編使後有可考他如東方朔之在吳爲書師
蔡邕之避怨於吳未詳其地不知所屬而梁鴻
之依臯伯通廡下地爲吳縣無庸概入志中懼
淆也志流寓

周

澹臺滅明字子羽武城人孔子弟子南游至江從弟子三百人識取子去就名施乎諸侯孔子聞之曰吾以言取人失之宰予以貌取人失之子羽史記索隱曰今吳國東南有澹臺湖卽其遺跡所在也

漢

梅福字子真九江壽春人爲南昌尉去官數上言變事輒報罷時京兆尹王章忠直譏刺大將軍王鳳專政擅權爲所誅王氏寢盛災異數見福上書極

言章面折廷爭孝元皇帝擢之以屬具臣陛下戮
及妻子折直士之節結諫臣之舌天下以言爲戒
最國家之大患也又言建始以來日食地震水災
亡與比數陰盛陽微金鐵爲飛此何景也又言漢
興以來社稷三危呂霍上官皆母后家也自霍光
之賢不能爲子孫慮故權臣易世則危書曰毋若
火始庸庸勢陵於君權隆於主然後防之亦亡及
矣上不納後又上書封孔子之世以爲殷後先是
匡衡建議爲王者存二王後所以尊先王而存三

統也上寢其議至福復言乃封孔子世爲殷紹嘉
公元始中王莽專政福棄妻子至九江人傳以爲
仙後人有見福于會稽變名姓爲吳市門卒吳地紀云
門爲蛇門後其門
塞地屬元和界

晉

王珣字元琳與謝元爲桓溫掾溫嘗謂謝掾年四十
必擁旄杖節王掾當作黑頭公俱見敬重由主簿
累遷輔國將軍吳國內史在郡爲士庶所悅徵爲
尚書右僕射轉左復領太子詹事隆安初王國寶

用事謀黜舊臣暹珣尚書令王恭赴山陵欲殺國
寶珣止之曰國寶雖終爲禍亂要罪逆未彰今先
事而發必失朝野望况擁強兵竊發於京輦誰謂
非逆國寶若遂不改惡布天下然後順時除之恭
乃止旣謂珣曰比來視君一似胡廣珣曰王陵廷
爭陳平慎默但問後終何如耳卒除國寶後加散
騎常侍卒謚獻穆改贈司徒初珣因謝安與絕婚
有讐及安薨哭之慟族兄獻之曰所望於法護法
護珣小字也弟珉字季琰小字僧彌才名出珣右

時人語曰法護非不佳僧彌雖爲兄辟主簿舉秀才不行後遷著作散騎郎黃門侍郎侍中代獻之爲長兼中書令時謂獻之爲大令珉爲小令年二十八卒珉在吳時居虎丘爲別業戴逵嘗與遊處珉買宅居崑山亦居虎丘之東山後珉兄弟俱舍別業爲寺

戴逵字安道譙國人愛會稽多名山嘗居剡下孝武時以散騎常侍國子博士累徵辭父疾不就郡縣敦迫不已乃逃於吳內史王珣有別館在武昌山

達潛詣之與珣遊處號爲吳中高士會稽內史謝
元慮達違道不返請絕名命達復還剡時會稽謝
敷澄靖寡欲入太平山十餘年名皆不就初月犯
少微少微一名處士星占者以爲隱士當之達有
美才人或憂之俄而敷死會稽人士以嘲吳人云
吳中高士求死不死

戴顓字仲若與兄勃並受琴於父達桐廬縣多名山
兄弟因留居止勃疾患醫藥不給顓欲干祿以濟
養乃求海虞令事垂行而勃卒乃止後出居吳下

吳下士人共爲築室聚石引水植林開澗少時繁
密有若自然三吳將守及郡內衣冠要其同遊野
澤堪行便去不爲矯介衆以此多之宋元嘉中徵
不就衡陽王義季鎮京口長史張邵迎願止黃鶴
山遂名戴公山寓吳時所居在唐爲司勳陸郎中
宅後爲北禪寺

唐

皮日休字襲美一字逸少襄陽人性傲誕隱居鹿門
自號問氣布衣咸通八年第進士崔璞守蘇碑軍

事判官入朝授太常博士嘗上書二通其一請以
孟子爲學科有能通其義者其科選同明經其二
請以韓愈配享太學謂有唐以來一人而已苟不
得在二十一賢之數於典禮未備也俱從之黃巢
陷長安僞署學士使爲識文疑其譏已遂及禍此
新唐書云爾尹師魯志皮子良墓云曾祖日休當
黃巢陷長安時依錢氏在浙無受僞官及遇害事
明王文恪整謂宋子京喜采瑣事小說作史時竟
以入正史理或然也日休寓吳與陸龜蒙所居臨

頓里相近往來唱和今其地稱皮市

羅隱字昭諫餘杭人本名橫十上不中第遂更名從事湖南淮潤無所合久之歸投錢鏐累官司勳郎未全忠以諫議大夫召不行嘗勸鏐討全忠大義憤激鏐不能用年七十七卒隱中歲入吳與陸龜蒙遊結庵於甫里北隅今遺址尚存

宋

蘇順欽字子美潼川人易簡孫父耆工部郎中當天聖中文多病偶獨舜欽與穆修好爲古歌詩雜文

一時豪俊從之遊初以父任補太廟齋郎調榮陽尉時玉清昭應宮災上疏極陳得失景祐初舉進士改光祿寺主簿知長垣縣遷大理評事康定中地震言事尤切直慶歷四年范仲淹薦爲集賢校理監進奏院初舜欽娶杜衍女衍時與仲淹富弼在政府多引用聞人興起庶政御史王拱辰等不悅會進奏院祠神舜欽及右班殿直劉異輒用鬻故紙公錢設樂會飲拱辰諷其屬魚周詢劾奏并欲搖動衍牽連仲淹舜欽異坐除名同時飲酒者

得罪逐出拱辰喜曰吾一舉網盡之矣舜欽率妻
子來吳作滄浪亭於吳越錢氏之南園扁舟載書
爲巾野服逍遙於紅蕖綠浪間間爲歌詩以泄憤
懣善草書酒酣淋漓從橫落筆爭爲人所愛慕後
得湖州長史卒年四十一嘉祐初韓琦奏復原官
所著滄浪集十五卷寓吳故居後名蘇家巷在南
園之東

尹焞字彥明洛陽人洙孫年二十師事程伊川願應
舉發策議誅元祐黨人焞曰尚可以求仕乎不對

時出靖康元年朝廷拜忠邪名用才德之士擢焯
不至以布衣名不至授以和靖處士明年金人陷
洛閭門被害焯死復蘇竄於長安山中長安陷劉
豫僭位以禮聘之逃去夜徒步渡渭厓劉水谷中
自商州奔蜀至閩紹興五年以崇政殿說書召力
辭時有攻程氏者焯曰學程氏者焯也生事之二
十年今又三十年矣請就斥朝廷耻之於是大臣
顯言焯拒劉豫之節學問之正上又思見焯名之
愈急迫上命布衣至行在所而病上賜金帛存問

慰勞須病愈受命病愈又辭上曰卿尚可辭耶朕
渴卿久矣卿從伊川俟卿講學不敢以有他遂
就職又除秘書郎明年遷太常少卿權禮部侍郎
除徽猷閣待制焯曰病不能朝矣而寵祿日至雖
主上賢我我何功德當之辭不已遂奉外祠寓平
江虎邱西庵時年七十矣又二年卒於紹興旅寓
方爲從政說書每赴講先夕沐浴更衣陳所講書
於案上朝服再拜齋於燕室謂必欲以所言感悟
君父安得不敬臨沒上遺表末云伏望皇帝陛下

益隆聖學廣被名賢惟祖宗爲陛下之規惟方策
爲陛下之鑑洪惟我宋度越前朝惟子惟孫有典
有則而況天方悔禍民獲小康益勤宵旰之憂必
復國家之始云云設謚曰肅準謚法因嚴教敬之
義

魏了翁字華父邛州蒲江人少稱神童慶元五年進
士召試學士院時韓侂胄謀開邊了翁力言其不
可築出衆大驚御史徐枬劾之出知嘉定府侂胄
誅收召諸賢會史彌遠當國不能用遷工部侍郎

旋與真德秀同罷御史梁成大謂真德秀真小人
魏了翁偽君子此舉大快公論識者笑之紹定中
直學士院在朝凡六月前後二十餘疏皆當時急
務帝將引其政而忌者合謀排擯之言了翁知兵
以同僉書樞密院事督視江淮京湖軍馬陞辭御
書鶴山書院四大字賜之尋召還固辭求去已而
以浙東安撫使就醫平江嘗至甫里築別業於羅
隱菴故址嘉熹初卒贈少師謚文靖所著鶴山文
集九經要義又有周易集義周禮井田圖說等書

龔開字聖與淮陰人少負才氣宋季與陸秀夫善宋亡僑居吳之東城持節孤峻不肯泛愛嘗作文天祥及秀夫傳金華吳萊見之稱其序事中寓幾諫予奪得遷固之遺時高郵龔璠亦寓吳與開爲忘年交時比之漢兩龔

呂浩叟故宋臣至元十一年兵下江南出使軍前持節見張宏範抗詞不屈明年宋亡舊臣朝于京授浩叟淮東宣慰使賜金符玉帶以疾辭後寓虎邱構壽樂堂卒葬其地

元

柳貫字道傳浦江人官翰林待制國史院編修弱冠受業於仁山金履祥既而從鄉先生方鳳粵謝翱諸前哲遊考秦漢以來文章變化磨礪講貫卒成名家至京師爲吳文正澄器賞程文憲鉅夫以墨一丸授之曰文章正印今屬子矣一時與黃潛吳萊聲名相埒宋濂戴良俱出其門年七十三卒私謚文肅寓吳時嘗居甫里書院有遷居甫里精舍詩并書院記

倪瓚字元鎮無錫人居有雲林堂蕭閒館清悶閣閣
如方窗三層疏窓四眺遙橫遠浦雲霞變幻彈指
萬狀閣中藏書數一卷手自勘定三代鼎彝名琴
古玉羅列左右性好潔見俗士避去恐免盟類易
水樹石時加洗拭畫筆蕭疎簡遠稱其爲人詩亦
如之至正初天下無事一旦舍去故業散給姻友
人或笑之其與富家多被禍瓚放舟五湖三泖間
寓甫里與陸德原虞堪輩爲詩文交不罹於難人
服其識明洪武七年始還鄉年七十四矣寓居鄒

氏沒吳人周南老志其墓曰元處士雲林先生

謝應芳字子蘭武進人幼講根柢學元至正時知天下將變隱白鶴溪構小室顏曰龜巢志退藏也郡辟爲鄉校師教弟子先質後文學者爭趨之舉三衛書院山長不就及天下兵起避地吳中或居吳淞江之甫里或居葑門之猷墅邨接其言論者謂謝子平平久之俱推讓爲不可及天下定仍歸昆陵年七十餘矣洪武初詔修元史梁寅汪克寬趙訪陳謨王彝高啟謝徵等皆以布衣見徵而應芳

以老病自晦免人益重之卒年九十七有辨惑編
龜巢滴蘂諸集

明

張觀字可觀嘉定人性好遊覽嘗以輕舟載卷軸往
還吳越遇佳山水輒畫留數日甚兩三月不去筆
墨所成或千巘萬壑或一角山或陂塘平遠皆入
神詣雖宗夏圭馬遠及與盛懋吳仲圭遊而自得
處皆天趣也徙居華亭轉之嘉禾既老僑居長洲
之周莊修圃灌花以終

王志堅字弱生更字淑士崑山人中萬歷三十八年
進士旋卜居郡城之南園肆志讀書其法先經後
史先史後子集讀經先注疏而後辨論讀史先証
據而後發明讀子則謂唐以後無子當取說家之
有裨經史者補之讀集則定秦漢以後文爲五編
考覈碑志援詩傳摭雜說以叅訂之少歲同嘉定
李流芳作詩卷帙甚富後刪存七十餘首持論不
苟然也通籍後授南兵部車駕主事歷郎中選貴
州提學僉事乞養不起天啟初起督浙江驛傳奔

母喪歸崇禎四年督湖廣學政禮部推爲學政第一凡二年卒於官

劉永錫字欽爾號刺庵魏縣人中崇禎丙子鄉試選長洲學教諭署崇明縣事庭無留獄未幾遭鼎革隱居相城有大吏造其室欲強之出永錫袒裼疾視曰我中州男子年二十渡漳河登大伍躍馬鳴鞘兩河豪傑誰不知我乃以此相逼將謂我畏死邪取壁上挂劍欲自刎門人抱持之得解尋移居陽城河之濱妻栗氏子臨女貞織席以食食不繼

時不舉火有遺之粟者非其人不受時隱君沈得
與欽圻亦來陽城定世外交嘗登高邱弔落日相
與歌泣永錫曰茫茫宇宙中路知己迺在沈君後
沈歸故里求同志士不得益困憊有老奴從魏縣
來勸之歸曰室廬故在也曰我非不欲歸奉君命
來此義不可歸命其子同老奴歸謂祖宗邱墓責
在汝麾之去時歲荒得食愈艱每襍糠粃作飯妻
病不能下咽竟餓死女許字同邑某氏子某氏宦
於粵音問阻絕恐以衣食累其父自經死前此其

子同老奴歸傷於盜墜車折臂死永錫旣無家買
一破船往來江湖間嘗泛舟中流鼓枻而歌曰白
日墮兮野荒荒逐鳬鴈兮侶牛羊壯士何心兮歸
故鄉風水蕩激歌聲甚道聞者哀之後幾年訖窮
餓死弟子徐晟陳三鬼友人陸泓葬永錫於虎邱
之山塘

姜埰字如農萊陽人崇禎辛未進士初除密雲縣令
收儀真有聲入爲禮部主事選授禮科給事中時
思陵求治甚殷冠氣猖熾而宰臣宜興周延儒首

鼠兩端陰重不泄埰欲爲折檻久矣會行人司副
熊開元召對德政殿語侵大臣時宜興在側上命
草疏入及疏入而上怒不可回遂逮開元命杖一
百埰於是劾宜興力辨開元無罪有云大臣不言
則小臣言之皇上何所見而偏徇若是語過激并
杖埰下錦衣衛獄幾死時埰弟垓方官行人因微
服劄匍事其兄周旋橐餠不去方獄急時而萊陽
寇陷埰父馮里以下闔門死難者數十人垓席萊
闔門願以身代埰歸葬喪事上爲惻然乃削埰籍

成宣城中申後塚放流吳市往來宣城間臨死謂
其子曰敬亭吾戍所也戍者吾君所命吾未聞後
命而君亡吾將罪人也死必埋我戍所年七十卒
葬宣城私謚貞毅先生立祠虎邱劍池之側子安
節實節安節歸宣城守墓而實節留吳守祠安節
字勉中有篤行實節字學在工詩畫師雲林晚寓
虎邱生前預立墓石題曰萊陽姜仲子之墓論者
或稱其達或以爲未忘後世名卽杜預沉碑意云
姜垓字如須給事塚之弟中崇禎庚辰進士出詹事

徐公汧門除行人初入署見題名碑有逆臣阮大
鉞崔呈秀姓名曰奈何與衆正同列特疏請碎其
額重書勒石思陵允之已而給事以直言得罪上
命錦衣逮治詔獄垓急難奔走出入圜扉無稍間
及受杖午門給事負痛氣絕垓口含溺喂之始再
甦日夜營護調治醫藥得不死及給事遣戍宣城
南都再建而權奸構黨阮大鉞輩方修舊怨必欲
殺垓而後快於是垓從吳門變名姓匿跡台宕間
殆免久之復來吳著有質簪集識者比於西臺之

慟哭澤畔之行今年四十卒葬西山之竺塢與給
事塚同祀虎邱學者稱萊陽二姜先生云子寓節
字奉世粹有門風

黃周星字九烟金陵人少育於楚湘周氏亦爲楚人
崇禎十三年進士又三年授計部主事明年夏以
國變棄家流寓吳越間在吳寓陽城湖濱後更名
人更字畧似號半菴晚又號笑蒼道人生平或笑
或哭感觸無端遇沈冥放廢之士執手悲歌聲激
水涯嘗自言身多患難幼時遇醜毒不死丙子公

車出洞庭遇盜不死丁丑遭寒疾不汗發狂不死
庚辰京邸歸竟亦不死丙戌避亂閩海復遇盜不
死浮沉三十餘年年七十仰天嘆曰吾今不可以
死乎與妻孥訣別慷慨飲醇酒盡數斗竟日夕不
醒人以爲真死矣仍不死後泛舟浙東被髮長嘯
自沉水死著述盈百卷今所傳者惟唐詩選驚天
泣鬼怕人集

國朝

戴易字南枝一字巢南山陰人慕嚴子陵之風著有

三千六百鈞臺詩太白句廣張三千六百鈞義取
諸此非專詠鈞臺也來吳中流寓虎邱與楊无咎
善又因无咎與徐枋定交枋臨沒以書招无咎易
偕至无咎爲撫其孤而易賣字爲枋營葬嘗冬日
衣葛終日不再食奔走婁東晉陵間積連歲賣字
金卒塋枋於真如塢時人義之後沒於虎邱所書
八分不漢不唐應求之工拙之外

唐甄字鑄萬初名大陶蜀之成都人父偕舉舉禎丁
丑進士官吳江令蜀中亂因家于官甄隨父至吳

好讀書兼理文書達治體亂後甄從間道歸省墳
墓時故廬已燬而一二親故無有存者寓居高崖
僧舍讀書其中值蜀秋試中丁酉舉人掾選山西
長子縣令首先蠶桑導民樹桑八十萬本公廩有
聲甫十月以逃人註誤去官復居吳甄非蔡漢之
書不讀嘗謂唐宋以來文章冗蔓不克舉秦火於
天下當舉秦火於私家著書不襲古人一語得銜
書上下篇共九十七篇志在權衡天下也後徵翰
名匿迹更名潛書詩以唐人爲宗屬族幽憂撫時

感慨蜀人費密寧都縣令嘗稱之晚沉潛詩疏作詩義數十卷年七十五卒於封門之東無子

李仙根字子靜號南津蜀遂寧人父實崇禎癸未進士爲長洲縣令而仙根留蜀養母會張獻忠破蜀所至屠滅仙根乃奉母奔吳時父已去官隱吳淞仙根灌園操作負米以養

本朝平定蜀後乃歸省墓中鄉試辛丑成進士入對第二人除宏文院編修遷侍讀康熙七年安南王黎維禡擅兵奪部統使莫元清高平土地事聞

上命仙根持節往諭歸元清故土賜麟蟒服晉秩一品乘傳至安南維禱堅不奉詔而選其國中利口數十輩更番狡辨仙根義不辱命執其通使大臣討之吏反覆開諭宣布

天子威德安南人見仙根風裁峻厲詞旨嚴正震懾以爲天人遂俯首服卒返其侵地而還還祭酒賸閩學會吳三桂叛

上以仙根文臣之知兵者命理餉駐荊州未幾召歸改副都御史時逆藩甫定無辜株連者甚衆仙根

力爲平反全活萬人尋陞戶部錢法侍郎歷三歲
以累誤罷官歸戊辰入都留補光祿寺卿卒於官
年七十

陳奕禧字子文海寧人工書法京朝士大夫多從學
書者究心金石之學窮山僻徑殘碑斷碣偶有所
見必剜剔苔蘚而出之以故藏庋甚富起家安邑
丞入爲戶曹郎出守石阡石阡道遠乏行資乃留
都下賣字一月得數千金以治裝至郡書天下第
一郡樓六大字於署自爲之記時人賦詩記述者

甚衆未幾以兄訖撫黔廻避歸流寓蘇州定慧寺
前再起南安守卒於官

施何牧字贊虞號覺庵崇明人
康熙乙丑進士官吏部考功郎
壬午典貴州試得人最盛請急歸得
明侍御顧嚴叟之高酣亭還家焉
薜門蘿屋青苔滿壁素心友至談討典籍終日忘倦清風披拂如
坐深山空林中外此聲勢交屏弗接也
官於吳者欲識其面不易得
張清恪公伯行撫吳同年友也
終其任一二相見最後張與制府噶互劾大吏承

問者及部議俱拮據張欲治以罪

聖祖仁皇帝罪制府嘉張清節復其官時士大夫交口
稱張榮遇牧獨曰受恩愈重報稱愈難察吏安民
以荅

聖天子倚毗願公刻刻在心講明理學轉在後也時
張斷斷分朱陸異同故云張益重之逍遙林下幾
三十年卒生平論詩必宗盛唐一語及宋詩者必
斥之有前七子李何遺風所著有一山詩文稿及
史聲明詩選等書

元和縣志卷二十七

孝義

呂氏春秋曰凡理國家者必先務本務本莫大乎孝夫孝三皇五帝之本務而萬事之綱紀也執一術而百善至後世風誼衰薄士大夫亦有不能盡者借父耰鋤慮有德色母取箕帚立而許語自漢已然矣勾吳爲禮讓之邦匹夫豎子皆知竭力庭闈永懷明節卽有殘肢體捐軀命過於中道然至性激發殺身不悔亦足以動天

地格鬼神維教化勵末俗焉至篤兄弟以任卹
厚宗族以睦嫺親親而仁民皆可紀也志孝義

明

戴君用父福之洪武中賊寇失火坐法君用上書請
代父死刑官聞於朝許之妻吳能植節

沈伯綱本孟姓少失父母沈勝五撫爲後勝五法當
誅伯綱年十七請代刑勝五不許固請代臨刑明
太祖怪年少問其故貸之并免勝五死

朱昱父當遠成年老不能行兄懼累適去昱願代遣

有司以不成丁不聽將年才十五迫逮其兄榜掠
皇殆遍肌肉消爛無怨言部使者憐之改留蘇州
衛

張啟字文理葑門郊外人以田爲業勤於力作親他
農率倍入家用是殷一鄉舉爲賦長凡賦役先期
辦集邑宰稱其能且能推所有以恤人之不足性
仁孝痛父早歿事母薛夙夜敬慎每額天祝曰使
吾母享百歲旣而果然母壽日敞拜於前諸孫曾
元羅拜於後母顧之喜呼老兒子不置母歿啟年

七十餘矣。解除之後，悲思不已。遭疾歿，殆古所稱孝弟力田者歟。

朱顯字景南，父歿廬墓三年，每聞哭聲，鳥鳥皆下鄰里。有與父母爭者，顯痛哭勸之。其人悔恨，卒盡子道。事聞，旌爲孝行之門。

顧淳年弱冠，父患痛風，痛不可忍。呼淳與決，欲自裁。淳禱於天，剪髮際肉，投藥以進。病立愈。

陸銓十歲，喪父。哀毀踰禮。後奉母盡孝。兩遇寇盜，負母出，哀呼勿令吾母受驚。殆舍之云。

杜遵家貧苦傭力養親父母相繼歿手自舂糗負土成葬地鄉人繪圖以傳

鄧汝南力貧養母妻以語言觸迂遣之終身不娶母有怒時掌其面汝南笑而謝曰勿傷母手母病刲臂肉旣歿肖像事之如生存

鄭熙母孀居四十年熙曲順母意至老如孩穉時母愛幼孫係季子出者婚娶俱先已子

孫永正字玉成宋朝議大夫欽齋五歲母喪在殯鄰火抱棺哀慟風旋火熄事繼母陸氏如所生父繼

康崇禎間佐上谷梁公爲令太康時流賊蹂躪太
康永正聞之奔省父晝夜徒跣行百五十里所過
城郭爲墟竟日不得食飲澗水以飽抵太康父方
與梁公孤城共守相見流泣乃間關奉父歸歸而
父病卒晨夕拜哭以頭觸柱柱爲之破歿私謚誠
孝先生郝忠敏彪佳撫吳重其行以險阻備嘗額
其堂列祀忠孝祠

顧愛石甫里人幼值母病父生赴神廟哀籲割右臂
愈母後父病割左臂亦如之

金孝子失名父未疾不能行有所詣必負之往還家
火災倉皇中婦已負翁出孝子誤認在牀褥也冒
烈焰入焚死亦甫里人

盧士達字德字青門塘人先代於世廟時值倭寇亂
捐貲助軍需旌爲義門士達精知書有至性父病
癰刺割股肉療之母蔣失明偕其妻陳晨夕互舐
遂復故父歿居喪盡哀每將旦椎胸慟哭聲徹戶
外閭巷感動曰盧孝子哭聲也廬墓三年不入城
市母歿士達已老猶孺子泣生平好善如利遇事

關風教者無不爲有橫逆不校其人悔輒與分咎
仲子應琦字景先長洲生亦有孝行先是士達好
施與家中落復以踐更賠累至應琦已爲窮人修
脰不足輒傭書以供甘旨得父母歡曰吾樂過三
公也旌爲父子孝行之門孫玉成少孤奉母亦盡
孝

姚木其門郊外人家貧事父缺甘脆時時雜傭保中
收工直養父冬寒持罾罾捕魚赤腳入波流遇大
魚如得異珍曰吾作老人饌也父持酒能作詩嘗

獨行庭中吟哦作父子狀木謂妻曰汝舅因之酒
詩未就急煖酒進詩成父歌呼起舞木亦隨後歡
笑每夜必待父寢聞鼻息聲乃入內父有怒必跪
問怒不息跪亦不起時呼妻同跪妻亦化之終年
無詬諍聲

馬瑤事母孝其配以御窮故勞瘁致疾死矢不重娶
所親以瑤年未三十勸買妾不聽復勸其母氏命
之不得已置一女奴已嫁之猶處子也義聲聞里
黨間有司上其事以義夫旌子驥爲翰林孔目亦

有孝行

王良相郡庠生年三十病危妻憂之得疾遽死後或勸之娶曰妻以我病憂死我以妻死復娶非人情也鰥居四十年郡守義之馬瑤居妻門良相居甫里皆嘉靖時人

顧國本字君寧貢生讀書務博綜經史有至行父病醵天祈身代夢神授以藥乃瘳傾家施予友人鬻去其產直千金不責償歲數爲粥以食餓者束身敦行鄉里矜式國變隱居不仕

端高才生承父志明季家亂避跡邱園與弟竑有
聲復社稱吳門二顧竑舉築至和塘旱改漕糧官
收官兌爲益桑梓端子雷力貧養母撫幼弟成立
拯人患難如在其身親族貧不能嫁娶喪葬者出
財襄贊竑子湫漸敦孝友祖墓遇水率合族謀遷
葬遇水旱捐資周濟鄉黨立義塚置祭田修族譜
漸居父喪盡哀禮伯仲均衣讓食救災卹患親族
賴之端以孫貴贈通奉大夫湫以子貴贈通奉大
夫湫以子貴封徵仕郎翰林院庶吉士

任郡丞環有館人名氏不傳世廟時倭寇薄蘇臺檄
環以鄉兵五百名禦之環出婁門兵市人子不習
戰遇寇獸散環獨身射寇寇中有赤鬚者持長刀
來砍環遇深溝一躍而過倭人見勢急挾環上馬
寇奮刀砍之刀及馬尾館人直前手搏寇連中數
刃死環得逸去後竟成殲寇功有鄉農二人方鋤
田寇自鮎魚口入獲之使爲導曰掠貨物多結汝
爲好兄弟二人故引之官軍處倭望見旗旄知二
人給已詰之曰我肯引強賊害良民耶呼殺倭寇

三倭怒殺之爛泥中頃官軍至倭就縛鄉人姓名亦不傳

國朝

顧鰲居葑溪之楊枝塘父仲常與金瑞夫博瑞夫以刃刺之中脅以手奉脅歸曰殺我者金瑞夫也言訖死時鰲方二歲稍長詢母得父死狀泫一刃挾以出入年十八遇金乘馬過胥口鰲尾之行金顧見鰲欲疾馳避鰲躍刺之金中傷投入水鰲亦投水連刺金金亦奪刃刺鰲俱死於水寺僧救之並

甦金誣以盜贖官具獄兵備王紀訊得實謂旣殺
其父又誣其子雖經赦不宥金遂伏辜

范可詢字問之生有至行悉以遺貲讓弟屏居白公
堤爲人樂易未嘗失色於人文正有瞻族義莊族
衆推舉爲提管經理三十餘年族賴以馴有同事
乾沒義租公私交累領產代償督修天平山祖廟
不辭勞瘁病暈卒族人德之配食文正書院及忠
烈廟予彌輟號漁莊太學生授職不仕勤儉起家
積良田千畝遺命其子希八義莊歲入五遺澤雍

正八年江蘇巡撫升公上其事

世宗憲皇帝詔旨旌獎擢瑤瑤部員外出知山西大同府族人公建專祠祀之文正書院

胡昌虞字同升號希山父節授徒於潯昌虞甫十齡間日詣父館省寒暖問起居大風雨必往後父柩在殯隣家失火延燒及屋昌虞自他所歸冒火入撫棺慟哭願與俱焚天驟雨滅火停棺室獨存昌虞犯煙燭死三日復蘇母病劇稽首北辰願減算益母父母既葬築室墓旁居三年晚遊京師栢鄉

魏文毅公重其行欲薦諸朝昌處以父母俱喪無
事祿養辭歸年七十一歿

楊成懋字振卿年方孩幼母施病危籲天願代母死
旋判股肉和藥進母病已治田搖城江以所入奉
甘晚侍膳堂下色怡怡然務得親歡心親歿幾滅
性旣葬築室於墓風雨辰必往展視牧豎感之弗
往牧事兄友愛撫孤姪如己子姊爲母鍾愛夫亡
迎姊暨三甥歸家養備至甥長以舅姓爲姓志不
忘也里中嘉其志稱仁里年六十六卒

朱之勸字德彰童年事親即能愉色婉容有訓則跪
聽年十一父客秦之勸忽寒顛因疑父在外衣單
亟製衣寄之父果於是日失冬衣家被盜執母以
身衛之母得不傷雍正五年題旌旌同旌者又
有孝子邱存禮孫豐穀之勸子象賢字聖涵有父
行孝事其母爲萬載縣靖肅惠聲

唐盛虞字順江九歲而孤事母至孝極貧母膳必以
甘藟明末寇亂母子相失號哭訪母遍及大江南
北戎馬倥傯晝伏夜行徒步經二三十里一日憊

於鎮江關帝廟夢帝以金鈴繫其臂肇虞心動遂走金陵遇一嫗見其憔悴無人形謂所自來泣以告嫗引之歸出所留婦見之果其母也因奉母歸孝養終身乾隆二年題旌

張文魁字東溪世居水門橋西性敦朴純孝家極貧傭工以養父母至者具肉食不自食攜歸奉親父歿營葬自具畚鍤蓋草舍於墓側夜其中晨夕上食如平時三年始斷哭泣甲申之變奉母及妹避兵之杭猝遇兵出失號泣於道蒙西門一年有客

自嚴州來與文魁同舟知其尊母故備述於相廬
縣見一老嫗自訴鄉里與文魁言合文魁立往吳
得母於王姓家妹亦在迎歸孝養二十餘年始卒
文魁年八十一歿乾隆三年題 旌孫華祝有孝
行學使李因培書額獎之

吳中英字咸之蘇家巷人父明山遊燕客死僕竊金
逸去妻李氏遺腹生中英未識父也長尋旅櫬負
黃袱赤雙踝往返者三最後至德州哭泣道左遇
僧指引入庵棺多塵積是否莫辨忽有羣鵲噪集

棺頂因得當時題識扶柩歸里營葬焉

盛建極字用敷年十二而孤父臨歿遺命曰吾父母棺未葬死有餘憾又吾生平以好施周急爲已任而天奪吾年汝能繼志吾曰可瞑矣建極涕泣受命稍長葬祖父母棺凡姻族中婚嫁喪葬無不仗助至老不衰遇事必稟命於母母最憐長女旣嫁家貧建極月給薪水撫諸甥請書習業友愛兩弟推產以悅母心里中有錦帆涇故跡久涇雨後溝水泛溢母於建極少時溺之曰汝長當修治以利

行人後卒如其言雍正十年題 游

黃農字古處五岳山人勉之六世孫居貧補坊母吳
遘病奉侍三載無倦容母歿日夕號慟經年後時
恍惚作見母狀家人悞為癩父呼與語問答如常
知非真癩也自是尪弱成疾父以名諸生授經于
外距家四五里每晨往省衙風雨父憐其疾止
之農後謹伺門外館僮出問起居知寢食安乃去
有日者謂父壽止五十二歲適先一歲冬病篤農
愕然日日者言將驗耶於歲除夕書減算添父年

疏元旦遍詣祀典正神廟祈禱忽一夕驚喜曰神
許我矣自是父果愈後農病篤時父在館中戒家
人勿驚告吾父以膳田易銀置枕畔謂妻金曰吾
得侍吾母矣其相吾兄嫂善事吾父妻敬諾始
報父歸舍淚執手歿父欲備棺衾無措得枕畔銀
哭失聲曰彼死猶恐貽吾歿也農事兄庭盡友愛
既歿身後事兄亦善視之妻金以苦節聞農乾隆

五年題 姓

顧惟灝字純侯 喪母事父竭誠 餘精力以養

極盡恭順父以事往采石中路遇盜挾白刃入舟
欲刃其父灝抱持盜泣一寧殺我勿傷吾父盜見
其肩血淋漓被體終不釋盜感歎而去既隨父之
浙西隣寓失火已延及灝適在外冒火入屋遽中
濕衣衾以蒙父負而出父得免灝膚髮俱焦父好
施予親朋有急難命子用之灝多方補救已至貶
承削食不使父知能養志也父母相繼歿灝年幾
四十哭泣如童穉卜葬不惑青烏家言一準司馬
溫公葬論能以禮事其親君子重之年六十四卒

方和鼎
乾隆五年題 旌

管增乾隆九年題 旌

夏珍乾隆十三年題 旌

蔣逢原字深資太學生廷鑑子年十三母病晝夜不
寢者三閱月母尋愈兄學海文河遊學四方逢原
偕其弟昕夕定省父母安之忘伯仲之不在側也

父卒三年泣血形體毀瘠隣家失火延燒其廬逢
原入火負母出顛顛於地每一指追母歿一如哭
父時葬祭盡禮妻熊氏年二十歲時逢原年二十

五不更娶不置妾媵邦人嘉其孝高其義

朱獻玉字元鑑世居葑溪年十七入郡庠補增廣生
胞弟獻琛有房悞賃狂生獲罪繼株連房主琛年
少怯對簿母丁素愛琛號天哭泣冀玉代雪而朱
忍出口玉遂慨然身代繫獄三年遇赦得免一時
士林推重之

龔漢英字邵先廩生績學未售家貧孝事父母居喪
幾減性兄歿事孀嫂如母撫孤姪姪女爲婚嫁析
已產資之壯歲喪偶終不復娶

戈地憲字令嘉少喪父肩隨伯叔提攜幼弟克盡友
于事母先意承志母老目盲親自扶掖不假手婢
妾伯兄未葬言及輒流涕晚召伯兄孫昇以金俾
營斧堂易簀之日適兄棺下窆時謂爲冥感既沒
親族皆哭失聲平時頗以舉火者也以子貴初封
修職郎再以孫貴贈通奉大夫

周謹字亦聞少以文章有聲庠序事父母孝待諸弟
友于父歿獨處遺室寔多恐安然後歸寢秉鐸懷
寧教諸生敦行立品應舉縣令母老辭歸母病侍

湯藥扶持抑搔衣不解帶中帶厠踰身自澣灑仲
叔兩弟亡過時而悲凡祀宗墳墓修葺祭掃不以
誨族衆族有貧者潛資其餽婚嫁費人皆德之
子秉義孝親敬兄克似其父亦能文章

戈元鑑字用光幼具至性事父母以孝聞習舉業見
父綜家政勞勩棄去代父經理咸當父心母病侍
湯藥數月衣不解帶父母沒哭泣盡哀喪葬盡禮
待兄弟無爾我間自韶說至白首怡怡友愛時謂
閨門雍穆有德有則可比陳元方兄弟推恩宗族

有無相濟衣寒藥病施棺代葬建義學助親友婚
嫁佐故交起家歲歉糶米減價平糶子孫世守其
法兩舉鄉飲不赴以子貴初封儒林郎再贈通議
大夫先是元鑰則捐義田四百畝爲合族公座元
鑰沒其子黃鴻黃泳黃淮黃湘增置腴田六百畝
共一千畝起建義莊以承父志大吏聞其一門孝
友父子相承乾隆二十六年聞于朝禮部尚書
稽璜爲撰墓誌

江國鎮字淵侯其先自歙遷居十四世父某毀盡禮

人稱孝童輩事其母鉅細必稟命而後行終日侍
母側進食必問母甘否曰甘心乃安或以事出一
日不見母則臥不貼席念故鄉四世未葬告母還
歛葬畢馳歸往聞不逾月隣居失火國禎聞信奔
歸視室廬在烈焰中奮身入見者牽之出曰入卽
死矣國禎曰母將焚尚求生耶竟負母出母歿擗
踊幾絕春秋祭享涕泗沾襟創建生祠祀其三世
以上置產以永蒸嘗有餘以贍宗族沈尚書德潛
習宮詹竊立傳表之

汪士榮字伯仁三歲喪母八歲喪父無伯叔兄弟祖母馮氏撫之以長自幼孝其祖母晨昏定省跬步不離娶婦合卺卽謂婦曰吾所以成立者祖母恩也若能孝我祖母吾無憾焉婦感其意待太姑如母祖母病士榮扶持抑搔不歸寢者一載對人輒引李令伯陳情表曰臣無祖母無以至今日祖母歿哀毀骨立鄉黨謂之照係言信行果成人之夙傾囊弗吝而於宗族尤厚族之吉凶患難惟士榮是依其歿也遠近親疎無不悲慟大壽書周觀察

廷變誌其墓韓官洗彥曾爲傳

楊模字子式號愚山浙江仁和人少隨父業吳遂家焉天性純篤事親以孝聞待諸弟友愛弟歿撫姪如已子年七十餘爲弟經理喪葬不以病老辭生平行事皆培本根務實學不苟時俗好尚交朋忠信一言之諾必踐救苗卹患不顧其身人以比漢之楊政郡守姚孔鈔舉模鄉飲以砥礪里黨不惑二氏說臨歿誡子孫毋作佛事雅好吟咏有寄閒詩稿訓子篇行世

陶篠字衛揚先世由鳳陽遷吳少儻有智計少遊
京師公卿引重而敦倫重義出於天性先是篠父
世魁念支派繁衍欲效范文正公建義田贍族而
力不逮賞志沒篠用計然術往來南北二十年積
金購常稔田一千一百五十畝成父志爲義田贍
族又捐金千以百兩造義莊二十三楹祀遷吳始
祖靖侯於其中而以父世魁配族之人歲計其口
月給其廩婚娶終喪給各有差立爲規條榜之義
莊大吏聞其事於

朝議敘員外郎卽用篠事父母綈色養母年高好施
予篠莫不先意行之待兄弟友于季弟早卒撫其
孤若己出友朋以急難告者傾橐相助無吝色與
人交不設城府或素有隙及撓於難挺身救之以
是鄉閭咸稱篠爲長者

朱嘉遇字上萃希文子嘗請行銷圩法絕虛田賠累
吳人德之子澄字天鑑石埭縣教諭廉潔持已訓
課有方改授江陵縣縣丞崇祀石埭名宦以子肇
基貴贈中憲大夫

顧秉忠字葵如少孤嗣伯父後善事兩親愉色婉容
曲體親志父歿既營窆寔廬墓三年一夕忽心動
不寧因思父母葬域或有未安擇日啟視見兩棺
欹側棺牆悉有水痕急覓易厝冒寒雪衝風雨入
山求地誓願不得善地不歸後乃卜葬於崑山友
愛同堂兄弟婚嫁有贈喪葬有助人有急難傾囊
拯救有古烈士風郡守羨公順較重其行建與賀
筵方伯王公諱師書額以贈及歿沈大宗伯德潛
誌其墓彭少司馬敬豐爲之傳

徐燭字漢廣世居諫湖東父君賢母馮氏三歲失事
繼母袁氏能先意承志年十三父病每夜對天祈
禱父沒擗踊哀號父有遺產盡讓兩兄獨葬兩世
五棺族中有未葬者捐貲以助妻朱氏亦贊成之
嚴禹鏐字殿英號蓉齋國學生議敘都佐精心計負
幹略自力以起其家而好義出於天性徐大中丞
撫吳建社倉禹鏐首捐高厰地一區以建倉輸穀
二百六十石歲饑平糶至千餘石司社倉十年勤
慎如一質庫田租父均恒以施人不少忤兄禹沛

宦遊傾資千金走七千里彌補庫項兄弟偕歸異
母弟三人推自置田與之各數頃置祭產建家祠
創義學以教里之子弟新橋梁以利行人行善如
不及而雍容孝弟一室太和至於今里黨稱之